



REPUBLIKA E SHQIPËRIË  
MINISTRIA E FINANCAVE  
DHE EKONOMISË

## **Kompanitë e biznesit me një bilanc të vetëm në banka dhe tatime. Në fillim 2018, rregullore e posaçme nga Banka e Shqipërisë dhe Ministria e Financave dhe Ekonomisë**

2017-12-07 12:24:00



Ministri i Financave dhe Ekonomisë Arben Ahmetaj dhe Guvernatori i Bankës së Shqipërisë Gent Sejko, mbajtën sot një konferencë të përbashkët për shtyp, për të ndarë me publikun nismën më të fundit të dakordësuar mes të dy institucioneve, në kuadër të masave për luftën kundër informalitetit në ekonomi, por edhe të strategjisë së përbashkët për reduktimin e nivelit të kredive me probleme në ekonomi.

Kompanitë e biznesit do të detyrohen të mbajnë një bilanc të vetëm, i cili do të jetë i përputhur me deklarin e tyre në tatime, duke frenuar abuzimin me bilancet fiktive, që nga njëra anë nxisin shmangien e detyrimeve tatimore reale dhe nga ana tjetër, ndikojnë në vlerësimin e aftësisë paguese të bizneseve për llogari të kreditimit në bankat e nivelit të dytë.

“Sot është fakt, që kompanitë e mëdha mbajnë dy bilance, një që deklarohet në tatime dhe një që dorëzohet në bankat tregtare për qëllime kredimarrje.

Ne kemi marrë angazhim, që kompanive të biznesit t’u njihet vetëm një bilanc zyrtar, që është i përputhur me deklaratën e tyre tatimore.

Kryeministri e ka artikuluar si masë në ditët e fundit dhe ne po e avancojmë, besoj do të konkretizohet me të gjitha detajet teknike nga Ministria e Financave dhe Ekonomisë dhe Banka e Shqipërisë, në një rregullore të posaçme, në fillim të vitit 2018” – deklaroi Ministri Ahmetaj.

Guvernatori Sejko tha se Banka e Shqipërisë ka vlerësuar me seriozitet dhe ka mbështetur në vazhdimësi nismat e ndërmarra për rritjen e formalizimit të ekonomisë.

“Plani kombëtar për reduktimin e kredive me probleme përcaktoi vendosjen e kriterit rregullativ, si një detyrë të rëndësishme për Bankën e Shqipërisë, që duke filluar nga viti 2018 veprimtaria e kredihënies të mbështetet vetëm në deklaratat tatimore. Banka e Shqipërisë e ka trajtuar edhe më parë këtë dukuri nga pikëpamja rregullative, por duke u kufizuar vetëm tek kredimarrësit e mëdhenj të bankave. Koordinimi i veprimeve me organet qeveritare dhe veprimet e përshtatshme të ndërmarra, kanë krijuar hapësirën e nevojshme për ta thelluar këtë masë rregullative në një bazë më të gjerë kredimarrësish” – u shpreh z. Sejko.

Ministri i Financave dhe Guvernatori theksuan se kjo masë do të sjellë përfitime afatgjata për të gjitha palët e përfshira në proces, për sektorin bankar, për biznesin dhe ekonominë në tërësi.

\*\*\*

### **Fjala e plotë e Ministrit Ahmetaj**

Përshëndetje,

Sot së bashku me Guvernatorin Sejko, duam të ndajmë publikisht dakordësimin që kemi në nivel institucional, për një masë të përbashkët, në kuadër të strategjisë së qeverisë shqiptare për reduktimin e nivelit të kredive me probleme në ekonomi, por patjetër edhe në kuadër të aksionit që vazhdon, kundër informalitetit.

Sot është fakt, që kompanitë e mëdha mbajnë dy bilance, një që

deklarohet në tatime dhe një që dorëzohet në bankat tregtare për qëllime kredimarrje.

Ne kemi marrë angazhim, që kompanive të biznesit t'u njihet vetëm një bilanc zyrtar, që është i përputhur me deklaratën e tyre tatimore.

Kryeministri e ka artikuluar si masë në ditët e fundit dhe ne po e avancojmë, besoj do të konkretizohet me të gjitha detajet teknike nga Ministria e Financave dhe Ekonomisë dhe Banka e Shqipërisë, në një rregullore të posacme, në fillim të vitit 2018.

Ka dy aspekte që unë do të doja t'i theksoja në kuadër të kësaj nisme.

Së pari, reduktimi i nivelit të kredive me probleme në ekonomi.

Problematika e kredive me probleme u trajtua gjerësisht gjatë mandatit tonë të parë 2014-2017. Grupi i përbashkët i punës mes Bankës së Shqipërisë dhe qeverisë, hartoi një strategji dhe plan konkret veprimi me qëllim reduktimin e NPL, ku një ndër masat e parashikuara ishte pikërisht "Dhënia e kredive vetëm në bazë të deklaratave tatimore".

Sigurisht që ky plan masash është konsultuar në masë të gjerë edhe me bankat e nivelit të dytë dhe unë besoj që ky është momenti që të vendoset një normë e re në marrëdhënien mes bankave dhe kompanive të biznesit.

Sot niveli i kredive me probleme është rreth 14.4% (gati 10% më ulët se viti 2013 ku arriti kulmin e 25% të totalit të kredive në ekonomi. Aktiviteti kreditues sigurisht që ka një gjallërim, ende modest gjithsesi, por padiskutim që aftësia paguese e kredimarrësve, është një faktor kyç në sjelljen e bankave në raport me kreditimin.

Prandaj, me qëllim frenimin e fenomendi të kredive të këqija, dhe nxitjen e kreditimit të shëndetshëm në ekonomi, ne kemi avancuar këtë nismë që besoj është një hap tejte i rëndësishëm që ndihmon edhe sistemin bankar që në vetvete përfaqëson sektorin më transparent dhe të formalizuar të ekonomisë.

Dhe ky është elementi i dytë që dua të theksoj. Në këtë fzë aktuale të aksionit tonë kundër informalitetit, ne kemi një fokus të posacëm tek biznesi i madh, duke bërë një skanim të thellë dhe më kompleks të fenomeneve të riskut që janë shfaqur si rezultat i të gjithë analizave tona të deritanishme.

Bilancet fiktive janë absolutisht një nga fenomenet kryesore, që jo vetëm shmangin pagesën e detyrimeve tatimore por reflektojnë edhe pasoja të tjera si deklarimi i pagave tejte të ulta, në raport me referencën e tregut të punës duke sjellë deformime të shumëfishta në treg.

Unë dëshiroj t'ia kaloj fjalën Guvernatorit dhe të përsëris edhe njëherë thirrjen për reflektim qoftë nga ana e sistemit bankar, ashtu edhe nga sipërmarrjet, sepse unë realisht besoj tek bashkëpunimi me sipërmarrjen, në favor të përmirësimit të terrenit ekonomik, nga i cili përfiton sipërmarrja, përfitojnë qytetarët dhe natyrisht, arrin të realizojë politikën e saj zhvilluese edhe qeveria.

Falenderoj Guvernatorin dhe Bankën e Shqipërisë e cila si në cdo rast, ka një rol thelbësor në koordinim e të gjithë aktorëve.

Falemindert!